

D Tüpflichysser 2023

Ja, grüessech wohl, da sy mer wider
'S isch es ganzes Jahr vergange
Syt mer ds letschte Mal bi Öich sy gsy

Zu üser grosse Fröid isch sider
d Fasnacht wider uferstange
Schön, syt Dir o dasmal mit derby!

D Elisabeth Baume-Schneider und Ölbert het me gno
Für Basel heisst das: leider nein, für Züri – schad! – grad o
Me het halt jitz di Liebe lieber z Bärn gha
E Vogt, e Herzog het me no nie gärn gha

Und statt bim Evi Allemann
Heisst's gly bim Jositsch: Allez Mann!

Drum tuet me diskutierte, öb ds Land jitz d Stadt regiert
Wül d Bure dominiere wärdi d Stedt diskriminiert
Da mache's d Wähler_*inne vor Gmeid Chüniz schlauer
Di näh e linggi Frou – und die heisst Bauer

Obwohl, das han i mit'bercho:
Nid alli sy da Fän dervo

Es glingt de Mediziner e Rise-Sensation:
Di schaffe geng wi fyner bi der Härztransplantation
Es Mönschehärz chunt use, ds Souhärz dry
I gloub, dä Ygriff isch bim Putin gsy

Nei, wäger nid, das wär ja vou
Beleidigend für jedi Sou

Es isch üs allne klar: Bim Strom u'm Gas längt's nid
Me gseht im nöie Jahr drum jitz e klare Unterschied:
We d Lüt toll heize, we si Beder näme
De tüe si sech am Schluss no ganz fescht schäme

Wül bim persönelleche Verzicht
Zeigt jede halt sys wahre Gsicht

Klopf, klopf, klopf, es ist Zeit
Für Scherze und Spass, gemeinsam bereit
Mit Lachen und Freude, den Tag erhellen wir
Kommt und seht, wie wir zusammen lachen, ohne Zögern hier
Dir findet, das syg jitz chli komisch gsy?
Eh ja, dä Teggscht isch vom Chat GPT

Da sy mer ersch beschränkt entsetzt
Und wärde no grad nid ersetzt

Der Gianni vo der FIFA isch Chef vor Korruption
Doch statt me dä würd yfa, git me ihm es Mikrofon
Är füel sech hütt, seit dise, behinderet und schwul
Und het eso bewise: I sym Gring isch öppis fuul
Di One-Love-Captain-Binde, wo steit für Mönscherächt
Di löi me la verschwinde, wül di pass dert eifach schlächt
Der Stadionbou hingäge, dä sygi ideal
Me chönn o würtlech säge 's syg für ds Klima alls neutral

Und toti Buezer? Sicher nid paar Tuusig!
Es isch eso: Katarrh isch eifach gruusig

U de? Mir hoffe, dass's Nech gfalli
Alles and're wäri gloge
D Stimmig schynt is ämel grandios

Doch halt, mir hei no gar nid alli
Gnüsslech dür e Ggaggo zoge
Drum chunt hie Teil 2, es geit scho los:

D Elisabeth isch wägg – doch d Monarchie no da
Der Harry total wägg, wül däm sys Buechli isch jitz da

Der Boris: ändlech wägg – und (hä?) d Liz Truss isch da...
...isch wägg, der Rishi Sunak da
Doch rymt sech o Sunägg uf „wägg“; wi lang isch dä äch da?

D Jacinda isch o wägg – der Macron blybt no da
Der Bolsonaro wägg, der Lula ds dritte Mal scho da

O d Gletscher sy gly wägg – der Klimawandel da
Ds Mitholz sy d Lüt mal wägg, wül d Munition isch geng no da

Der Federer isch wägg – es Tränemeer blybt da
O Föözen nimmt sech wägg, doch yeah: der Odermatt isch da!

'S git vil, wo sötte gah – und eine per Se
Lä lä lä lä lä lä A-lää Lä-lä...

Wül ehrlech, nach der nächschte Lugi
Geit's ab uf Frankrych mit em Flug!

Vor BLS di Schiff, di wärde nid verchouft
Me heigi alls im Griff, heisst's dert, es Nöis wärd gly scho touft
Der Kanton Bärn git ds Gält, wo si nid hei
Abschiffe chöi die würtlech guet elei

Wül B-L-S – so wi die weisse –
Chönnt «Bringet lieber Stüüre!» heisse

'S isch fei es Zytli här, der Film vom Dokter No
U glych weis jede, wär dass dert zum Meer isch usecho
'S isch ds Ursi Andress, mit de schöne Rundige
Doch süsch chunt weni Schöns vo Oschtermundige

Der Stapi wott's glych dürestiere
Und um z Verrecke fusioniere

Ja, d SNB macht hüer Verluscht, es isch nid schön
Das chunt üs zimlech tüür, grad wäg em Loch bi den Kantön
'S nützt nüüt, sech nach de Millione z sehne
Me chönnt – wi d Stadt – bim Gianni paar etlehne

Em Aebersold isch das egal
Es göng um d Zinse, nid d Moral

E Band, won i chli kenne, di hei gly es Konzärt
Da fröie si sech henne, wül so stygt de ihre Wärt
Es isch ir Brass – u drum wei si sech äbe
Churz vor em Uftritt dert uf d Büni chlääbe

'S müesst nume eim chli unwohl sy
De wär der Gig süsch scho verby

I üser' schnälle Zyt, da fingt me chuume me Rue
Jitz sy mer scho sowyt: Ds normale Tempo isch nümm gnue
Hütt lost me uf sym Händy mit Doppel-Gschwindigkeit
Was wider e eländi Lyritante druuf het seit
Bir Musig und bi Filme, o da heisst's: «Jitz mal Hü!»
U scho wird gspeedet, wil me het ja Tempo Faktor 3
So geit si immer wyter, die Gschwindigkeite-Gier
Und ohni's z merke syt Der uf Beschlöinigung mal 4
.....üüf.....fööf

Eso sy durchuus paar Minute z gwinne
Me fat derfür o ganz schnäll afa spinne

So, jitz isch o fertig mit de
Stänkerer u Wadebysser
Mir sy wider nätter – vorderhand

'S fröit is, syt der cho zur dritte
Usgab vo de Tüpflichysser
Schöne Aabe – Adio mitenand



www.benvatter.ch
www.crazydavid.ch

→ auch auf YouTube: «D Tüpflichysser 2023»